



UNIVERSITÄTS-
BIBLIOTHEK
PADERBORN

Universitätsbibliothek Paderborn

Apotheca Spiritualem Pharmacorum Contra Litem Contagiosam Aliosque Morbos

Wichmans, Augustin

Antverpiae, 1626

Cap. LIII. De S. Roselea Panormitana.

urn:nbn:de:hbz:466:1-9653

C A P. LIII.

De sancta Roselea Panormitana.

Q Vinque prudentes Virgines hactenus enumeraui, quæ oleo misericordiæ & caritatis suæ, ardentem pestilentia ignem multorum corpora depascentem, sæpiùs restinxerunt: en modo sextam subijcio, non è numero illarum fatuarum desumptam, sed verè virginem sapientem & vnam de numero prudentiù; quæ eò, magis hoc loco venit enumeranda, quòd eius beneficia sint omninò recentissima, & veluti apertâ adhuc manu omnibus suis clientibus eadem sit impartiri parata. Est verò hæc rosea illa virgo S. Roselea, tam clara virtutibus, quàm nobilis prosapia; nobilissimo siquidem stemmate nata fuit, nempe ex sanguine antiquorum regum Sicilia oriunda. Hæc à quadringentis, & quòd excurrit, annis sanctissimè in Domino defuncta, & sponso suo cælesti, quem vnice hîc in terris dilexerat, & præ cuius amore, regnum mundi & omnem ornatum sæculi contempserat, indiuisibiliter sociata, diuersis fide dignis personis secundùm quietem sæpè apparuit, monens vt corpus suum in terræ visceribus reconditum, & veluti ignorantia densis tenebris inuolutum, diligenter perquirerent, vt ad multorum salutem debitæ venerationi exponeretur. quo exemplo, vt & multorum aliorum Sanctorum, discant iurati eorum hostes, hodierni Nouatores, rectè sacra Sanctorum pignora à fidelibus honorari, quandoquidem ipsi Sancti, Deo id procurante, in quem & in quos idololatriæ aut superstitionis culpa minimè cadit, ad huiusmodi honorem nos excitent.

excitent, & meritò. corpora enim eorum fuerunt organa animarum ad omne opus bonum. fuerunt & sunt instrumenta Dei ad miracula. sunt pignora patronorum, exuuiæ carissimorum, trophæa triumphatorum, quæ à Deo sunt designata ad gloriam incredibilem, nimirum, vt sint post resurrectionem corpora sole clariora & corporibus omnibus, sint Ducum, sint Regum, sint Imperatorū, longè præstantiora. Deus itaque volens calamitosum hoc sæculum nouo gaudio recreare, superiori anno, scilicet 1624. die 14. Iunij, in Monte Pelegriño prope Panormum gloriosissimæ huius Virginis corpus miraculosis indicijs dignatus est reuelare, quod mox pompâ solennissimâ in prædictam urbem, immunerâ Cleri populique comitante multitudine, fuit delatum, vbi hodieque multis miraculis coruscans in Ecclesia Cathedrali requiescit, & ab vndequaque concurrentibus fidelibus religiosè visitatur. Præter innumera beneficia quæ deuotis suis clientibus exhibuit, illud totâ Siciliâ notissimum & celeberrimum est, quòd hoc ipso anno 1625. grauissimâ peste eam liberauerit, ita vt ex illa nemo deinceps fuerit mortuus: omnes verò infirmi protinus conualuerint. quam gratiam non sola Sicilia, sed integra Italia, omnesque confines Prouinciæ pleno ore hodie confitentur. Habita tunc fuit Panormitana in Ciuitate, supplicatio, quàm vniquam vidit Sicilia, solennitate maximâ, in qua numeratæ, vltra decem millia, ardentes tædæ, flagrantem deuoti pectoris ignem significantes, extructi pariter à diuersis Rebuspub. ad æmulationem in honorem sanctissimæ Virginis & fidelissimæ suæ Tutelaræ concertantibus, sumptuosissimi Arcus triumphales, quorum vnus sexaginta millia florum superabat. Stupenda sunt & verè *Admiranda Sicula*, quæ de hac solennissimâ supplicatione, ex fido

relatu oculati testis, qui eidem interfuit, didici; quæ omnia avidus Lector à Siculis scriptoribus breui pleniùs intelliget. Dicitur iam à quadringentis annis, auctoritate Sedis Apostolicæ, in Sanctorum Catalogum relata, licet Martyrologio Romano hætenus non fuerit inscripta. Simile contigit Sanctissimo Patri Nostro Norberto, qui non ita diu post mortem suam in Sanctorum Catalogum fuit relatus, licet in recentioribus Martyrologijs ante Gregorium XIII. editis, non ita passim fuerit repertus, constat siquidem eundem Patriarcham à temporibus Innocentij III. pro sancto habitum fuisse; & exinde inscriptus Martyrologio Romano & vetusto Vaticano. quod nescio quâ de causâ, multos plurimis annis latuerit. vt grauissimè errare conuincantur qui eum demùm à Gregorio XIII. canonizatum volunt; cum hic tantummodo priùs factam Canonizationem, tunc temporis non omnibus ita cognitam, in clariorem notitiam protulerit, & nouo diplomate confirmauerit.

Carolus
Stephan.
in dictio.
geograph.

Est verò supradictum Panormum siue Panhormum, Ciuitas Siciliae, & portus; dicta sic à nauium applicatione, quæ vndique illuc conueniunt; est enim ὄρμος, portus pars. vnde nautæ dicuntur hormizare, id est, nauem anchoris & retinaculis instruere quo secura sit in portu à repentinis procellis. Vulgò dicitur *Palermo*.

C A P.